

ԱՐՄԻՆԻԱ ՈՍՏԻԿԱՆՈՒԹՅԱՆ ՍԱՀՄԱՆՆԵՐԸ

ԱՐՄԱՆ ԵՂԻԱԶԱՐՅԱՆ

Արմինիա ոստիկանությունը կազմավորվեց VIII դ. սկզբին, երբ արար գորավար Մուհամմադ իբն Մաբուանը նվաճեց Հայաստանը, Վիլքը, Աղվանից աշխարհն ու մերձկասպյան շրջանները՝ Կուր դեֆտից մինչև Դարբանդ: Ըստ արար հեղինակների՝ Արմինիան բաժանված էր չորս մասի, որոնք համապատասխանաբար կոչվում էին Առաջին, Երկրորդ, Երրորդ և Չորրորդ Արմինիա¹: Քննության առնելով Արմինիա ոստիկանության սահմանների խնդիրը՝ մենք դալիս ենք այն եզրակացությանը, որ խալիֆայության այդ կուսակալության վարչատարածքային բաժանումը համարյա թե նույնությամբ կրկնում էր Սասանյանների տիրապետության ժամանակաշրջանի Հայոց, Վրաց և Աղվանից մարզպանությունների վարչական պատկերը²: Ինչ վերաբերում է Չորրորդ Արմինիային, ապա դրա կազմում ընդգրկված էին Բյուզանդական կայսրությունից նվաճված Մեծ Հայքի արևմտյան աշխարհները՝ Բարձր Հայքն ու Մոփքը, որոնց մերձեկրատյա գավառներն ընդգրկված էին արաբաբյուզանդական սահմանային ամրությունների գոտում, ինչպես նաև Մեծ Հայքի Տուրուքերան աշխարհի այն գավառները, որտեղ արարական ցեղեր էին վերարնակեցվել:

Արմինիա ոստիկանության սահմանների խնդրով զրաղվել է Ս. Շլեպչյանը³: Նա Արմինիայի սահմանների քննության համար հիմք է ընդունել

¹ IX դ. արար աշխարհագրոս Իբն Խորդադեհը հաղորդում է, որ Արմինիան բաժանված էր չորս մասի. «Առաջին Արմինիա. Սիսաղան, Առան, Թիֆլիս, Բարդաա, Բայլական, Կաբալա և Շարվան, Երկրորդ Արմինիա. Ջուրդան, Սուղդարիլ, Բար Ֆիրուզ Կուբադ և ալ-Լաբը, Երրորդ Արմինիա. Բուսֆուրրաջան, Դաբիլ, Սիրաջ Թայր, Բաղրավանդ և Նաշավա, Չորրորդ Արմինիա. Շիմշաթ, Խիլաթ, Կալիկալա, Արլիչ և Բաջունայա» (տե՛ս I b n K h o r d a d e h. Kitab al-masalik wa'l-mamalik.-Bibliotheca geographorum arabicorum (այսուհետև՝ BGA I-VIII, 1967), VI, Lugd. Bat., 1967, p. 122-123): Նույնը վկայում են նաև Բալագուրին (տե՛ս 231 ص ۱۹۰۶، القاهرة، ۱، النلدان، كتاب فنوح اللدان، ۱) և Իբն ալ-Ֆակիհը (տե՛ս I b n a l - F a k i h a l - H a m a d h a n i. Kitáb al-boldan.- BGA, V, p. 286-287):

² Ըստ Ս. Երեմյանի՝ Հայոց մարզպանության կազմում, նախքան 591 թ. բաժանումը ընդգրկված էին Մեծ Հայքի Այրարատ, Տայք, Տուրուքերան, Մոկք, Վասպուրական, Սյունիք (վերջինս 571 թ. ապստամբության նախօրեին առանձնացել էր Հայոց մարզպանությունից (տե՛ս Պատմութիւն Սերէոսի (այսուհետև՝ Ս ե բ ե ո ս), աշխատասիրությունը Գ. Արզարյանի, Երևան, 1979, էջ 67-68) աշխարհները (տե՛ս Ս. Ե բ մ յ ա ն. Հայաստանը ոստ «Աշխարհացոյց»-ի. Երևան, 1963, էջ 118): Սակայն քննությունն ապացուցում է, որ Հայոց մարզպանության կազմում մնացել էին նաև Կորճայքի Կորդիք և Տմորիք երկրամասերն ու Պարսկահայքի հյուսիսային գավառները (այս մասին մանրամասնորեն տե՛ս ստորև): Վրաց մարզպանությունն ընդգրկում էր Վերին աշխարհ Վրացը, Մեսխեթին, Կախեթ-Կուխեթը, Սրգվեթը, Գուգարքը, Ալանաց դռների ամրությունների շրջանը, իսկ Աղվանից մարզպանության կազմում՝ Բուն Աղվանից աշխարհը, Արցախը, Ուտիքը, Ռոտստակը, Բազկանը, Դարբանդը, Թավասպարքը, Ղեկքը, Չողան, Շրվանը և Խարվանը (տե՛ս Ս. Ե բ մ յ ա ն. նշվ. աշխ., էջ 119-120):

³ Ս. Շլեպչյան. Արարական խալիֆայի վարչական քաղաքականությունը Հայաստանում (7-9 դդ.) (պատմ. դիտ. թեկ. գիտ. աստիճանի հայցման ատենախոսություն). Երևան, 1954:

ալ-Իսթախրու վկայությունը, թե արաբների կողմից որպես մեկ երկիր (կլիմա) դիտվող Արմինիան, Առանը և Աղարբայջանն արևելքում սահմանակցում են Ջաբալին, Դալլամին և Խազարների ծովի (Կասպից ծով) արևմտյան ափին, արևմուտքում՝ Արմանին, որին մենք դեռ կանգրադառնանք, և մասամբ Ջազիրային, Հյուսիսում՝ ավաններին ու Կաբկ լեռներին (Կովկասյան լեռներ), իսկ հարավում՝ տարածվում մինչև Իրաքի սահմաններն ու Ջազիրան⁴: Սակայն քանի որ Աղարբայջան անվանումն արաբ հեղինակները տալիս են Ատրպատականին⁵, ապա ալ-Իսթախրու հիշատակած այս սահմաններն Արմինիա ոստիկանությունը վերադրելը ճիշտ չէ կամ գոնե ճիշտ չէ մասամբ՝ կապված հարավային սահմանի հետ:

Ձեռնարկելով Արմինիա ոստիկանության սահմանների քննությունը՝ նշենք, որ, ըստ արաբ հեղինակների, Հյուսիսում Արմինիա ոստիկանությունը սահմանը կազմում էր սահմանային ամրությունների մի գոտի, որը ձգվում էր Ալանաց դռնից (Բաբ ալ-Լան) մինչև Դարբանդ (Բաբ ալ-Աբվաբ): Իբն ալ-Ֆակիհը, պատմելով այդ սահմանային ամրությունների գոտու մասին, հաղորդում է, որ այն բաղկացած էր 360 ամրոցներից: Դրանցից 110-ը գտնվում էին մուսուլմանների տիրություններում՝ մինչև Թաբարսարանի հողերը, իսկ մնացածները Ֆիլանում և Սարիրում մինչև Բաբ ալ-Լան⁶: Միայն Բաբ ալ-Աբվաբի շրջակա լեռներում կային 14 ամրոցներ⁷: Իբն Խորդադեբհը, անդրադառնալով սահմանային ամրությունների այս գոտուն, պատմում է, որ դեռևս Սասանյանների տիրապետության օրոք Խորդով Անուշիրվանն այստեղ կառուցել էր բազմաթիվ ամրություններ: Նա հստակորեն նշում է, որ Բաբ ալ-Աբվաբ անվանումը (Դռների դուռ) վերաբերում է Դարբանդին, իսկ սահմանային ամրությունների գոտին նա անվանում է ալ-Աբվաբ (դռներ): Այս դռները կառուցված էին Կովկասյան լեռների կիրճերի ելքերի մոտ և դրանց թիվը հասնում էր 360-ի: Դրանցից էին Բաբ-Ալանը, Բաբ Սահիբ աս-Սարիրը, Բաբ Ֆիլանշահը, Բաբ Թաբարսարանշահը և այլն⁸:

Իբն ալ-Ֆակիհի վկայությունից հետևում է, որ սահմանային ամրությունների գոտում՝ Դարբանդի ամրությունների շրջանից դեպի արևմուտք, հերթականությամբ գտնվում էին Թաբարսարանը, Ֆիլանը և Սարիրը, որոնք Արմինիա ոստիկանության մաս էին կազմում⁹: Թաբարսարանի տեղը Հայտնի է. այն գտնվել է այնտեղ, ուր այսօր էլ բնակվում են Թաբարսարանները, այսինքն՝ Ռուբաս գետի վերին ու միջին հոսանքի ավազանում¹⁰:

⁴ A l - I s t a k h r i. Kitáb masalik al-mamalik – BGA, I, 1967, p. 181.

⁵ Jacut's Geographisches Wörterbuch aus den Handschriften zu Berlin, St. Petersburg und Paris herausgegeben von Ferdinand Wüstenfeld (այսուհետև՝ J a c u t). Leipzig, 1924 (in sechs Bänden), b. I, S. 171-175.

⁶ BGA, V, p. 286-287.

⁷ BGA, I, p. 193.

⁸ BGA, VI, p. 123-124.

⁹ BGA, V, p. 290-291. Ֆիլանը գտնվում էր Սարիրի գերիշխանության ներքո, քանի որ Սարիրի թագավորը կրում էր Ֆիլանշահ տիտղոսը (տե՛ս J a c u t, I, S. 350):

¹⁰ Этническая карта Дагестанской АССР. – «Народы мира», Т. I, «Народы Кавказа», М., 1960, с. 416, карта. Հմտ. История, география и этнография Дагестана XVIII-XIX вв., М., 1958, с. 86 – 87, 102 – 107, 150 – 154, 197 – 199, 311 – 317.

Սեփական «րաբ»-երով նշանավորված Ֆիլանը պետք է փնտրել Կովկասյան լեռների արևելյան հատվածի հյուսիսահայաց լանջերին՝ Սարիրի և Թաբարսարանի միջև: Ուսումնասիրողները Սարիրը¹¹ տեղադրում են Անդյան ու Ավարյան Կոյսուների հովիտներում¹²: Սարիրի այդպիսի տեղադրության օգտին են խոսում հետևյալ կարևոր իրողությունները. նախ Սարիրի թագավորը կոչվում էր «ավար»¹³, ինչը պարզորոշ ցույց է տալիս Սարիրի կապն այժմյան Ավարստանի հետ, հետո՝ այստեղ՝ Անդյան և Ավարյան Կոյսուների վերին հոսանքների միջև, գտնվում է իսկապես քաղաքը, որը, ըստ երևույթին, համապատասխանում է Մարուանի երկրորդ արշավանքի ժամանակ հիշատակվող Սարիրի իսլամյալ ամրոցին¹⁴, ապա՝ այստեղ է գտնվում Հումրաթ գյուղը¹⁵, որն էլ, թերևս, նույնական է Սարիրի Հումրաթ մայրաքաղաքին¹⁶: Բացի այդ, Սարիրի Ղումիկ ամրոցն էլ¹⁷, իր հերթին, համապատասխանում է այժմյան Ղումուկ քաղաքին¹⁸: Սարիրի և իսլամների թագավորության միջև սահման էր հանդիսանում Ավարյան Կոյսու դեպի և Դաղստանի դաշտավայրային մասի Կասպից ծովը թափվող գետերի միջև ջրաժան ծառայող լեռնաշղթան¹⁹, որից դեպի հյուսիս-արևելք գտնվում էր խաղարական Սամանդար քաղաքը: Վերջինս Ս. Երեմյանը տեղադրում է այժմյան Մախաչկալա քաղաքից հարավ՝ Թարքի վայրում²⁰: Աշխարհագրական առումով Սարիրի արևմտյան սահմանը պետք է անցնելիս լինե՞ր Անդյան Կոյսուի ձախ ափին ձգվող լեռների (որոնց հյուսիսային հատվածը կոչվում է Անդյան լեռնաշղթա) ջրաժան գծով²¹:

¹¹ Սարիրի թագավորության մասին մանրամասնորեն տե՛ս Ա. Ե Ղ ի ա զ ա ր յ ա ն. Արարական աղբյուրների Սարիրի թագավորությունը. «Գիտության գլորուս», 2004, հ. 4, էջ 99–106:

¹² С. Е р е м я н. Моисей Каланкатуйский о посольстве албанского князя Вараз-Трдата к хазарскому хакану Алп-Илитверу. — «Записки Института востоковедения АН СССР». Т. VII, 1939, с. 144; В. М и н о р с к и й. История Дербенда и Ширвана IX-XI вв. М., 1963, с. 132-137.

¹³ Kitáb al-a'lak an-nafisa auctore A b ũ - A l i A h m a d - i b n - O m a r i b n R o s t e h . - BGA, VII, p. 147.

¹⁴ 245 ص ١٩٦٧، بيروت، الكامل في التاريخ، ابن الأثير، (Խաղաղ) ځنزاخ- (Խունդախ) շփոթը միանգամայն հնարավոր է (Ա. Ե Ղ ի ա զ ա ր յ ա ն. Նշվ. աշխ., էջ 102):

¹⁵ История, география и этнография Дагестана XVIII-XIX вв., с. 270-271.

¹⁶ 193 ص ١٩٤٨، القاهرة، ١-٢، مروج الذهب و معادن الجواهر، (Ա. Ե Ղ ի ա զ ա ր յ ա ն. Նշվ. աշխ., էջ 102):

¹⁷ BGA, VII, p. 148.

¹⁸ Այդ համապատասխանեցումն անում է Ս. Երեմյանը (Ս. Երեմյան. Հայաստանը և Հարևան երկրները 855–953 թթ., քարտեզ. Երևան, 1976): Այս դեպքում այլ հարց է առաջ գալիս. Ղումուկը գտնվում է լակերի երկրում, որը, ինչպես կտեսնենք, համապատասխանում է արար հեղինակների Տուման իշխանությանը: Պետք է նշել, որ արար հեղինակների վկայություններից երևում է, որ մի ինչ-որ ժամանակ Դարրանդի և Ալանաց դուռն միջև գտնվող լեռնային շրջանը դրված է եղել Սարիրի տիրոջ՝ Սահիր աս-Սարիրի իշխանության տակ (տե՛ս J a c u t, I, S. 221-222): Ուստի՝ Ղումուկ-Ղումուկի Սարիրի իշխանության մեջ գտնվելու մասին հիշատակության պատճառը պետք է, որ այդ ժամանակների իրողության արտահայտությունը լինի:

¹⁹ С. Е р е м я н. Նշվ. աշխ., էջ 144:

²⁰ Նույն տեղում, էջ 142–143: Տե՛ս նաև Ս. Երեմյան. Հայաստանը և ... քարտեզ:

²¹ Տե՛ս ուսսական ցարական բանակային շտաբի հինգվերստանոց քարտեզի Ж. 5. և Ж. 6. պլանշետները:

Արաբական աղբյուրների Ջարիքիրան իշխանությունը գտնվում էր Ղուրաչի ավանի շրջանում²², իսկ վերջինից արևմուտք տարածվում էր Տումանը, որը Մարուան իբն Մուհամմադի՝ դեպի ինգարական թագավորություն կատարած արշավանքի ժամանակ հիշատակում է իբն ալ-Ասիրն ի թիվս Սարիրի, ալ-Լաքզի և այլ իշխանությունների²³: Մեր կարծիքով, Տումանը Համապատասխանում է լակերի երկրին: Բանն այն է, որ իրենց Հարևան լակերին կամ կազիկումուխներին «տուման» (Հոգ. տումալ) անվամբ կոչում են ավարները²⁴, որոնք արաբական տիրապետության շրջանում բնակություն էին հաստատել Սարիրում²⁵: Իսկ արաբները Տուման ներխուժեցին Սարիրից²⁶: Լակերն այսօր էլ բնակվում են Կազիկումուխյան Կոյսու գետի վերին ու միջին հոսանքի ավազանում²⁷: Տումանի ու Ջարիքիրանի Հարևանությամբ, Թարարսարանից ավելի հյուսիս, գտնվում էր Ֆիլանը²⁸: Այն պետք է գտնվեր Սարիրից դեպի արևելք՝ զբաղեցնելով հիշյալ ջրբաժան լեռնաշղթայից հարավ-արևելք գտնվող լեռնային շրջանը մինչև Ղուրաչի:

Այսպիսով՝ Արմինիայի հյուսիսային սահմանն Ալանաց դռնից արևելք Կովկասյան լեռների դադաթնազծով շարժվելու էր մինչև Անդյան լեռնաշղթան և այդ լեռնաշղթայի ջրբաժանով հասնելու էր Սուլակ գետին, որից այն կողմ՝ Ավարյան Կոյսուի արևելյան ջրբաժանով իջնելու էր հարավ, որտեղ, լակերի երկրից դեպի արևելք ընկած լեռնային շրջանում, գտնվում էր Ֆիլանը:

Արևելքում Արմինիա ոստիկանությունը սահմանակցում էր Կասպից ծովին, իսկ հարավում դրա սահմանն անցնում էր Կուր և Երասխ գետերով՝ Ատրպատականի ոստիկանության կազմում թողնելով Մուղանը²⁹, Վարսան-Վարդանակերտն³⁰ ու Բագդ երկիրը³¹: IX-X դդ. արար աշխարհագետ

²² Ըստ Մասուդիի՝ Ջարիքիրանը գտնվում էր Սարիրից արևելք և իրենից մի փոքրիկ անտիկ իշխանություն էր ներկայացնում: Այդ անվանումը պարսկերեն նշանակում է «զրահագործ վարպետներ» (տե՛ս ابن الأثير, էջ 192): Ջարիքիրան երկրի տեղորոշման Համար կարելի է հիմք ընդունել Մ. Արտամոնովի և Վ. Մինորսկու տեղագրությունը: Կովկասագետները, հիմք ընդունելով «Ջարիքիրան» անվան պարսկերեն թարգմանությունը, այդ երկրի ժողովրդին նույնացնում են այժմյան Ղուրաչի ավանի բնակչության հետ, որոնք այսօր էլ Հայտնի են իրենց հնամյա արհեստով: Այսինքն՝ Ջարիքիրան իշխանությունը զբաղեցնում էր Ղուրաչի քաղաքի շրջակա տարածքը (տե՛ս М. А р т а м о н о в. История хазар. Л., 1962, с. 229; В. М и н о р с к и й. Նշվ. աշխ., էջ 203, ծանոթ. 71):

²³ *Տե՛ս* ابن الأثير, IV, էջ 216, بلاذري, I, էջ 245:

²⁴ Народы Кавказа, с. 487. *Տե՛ս նաև* А б у М у х а м м а д А х м а д и б н А ' с а м а л - К у ф и. Книга завоеваний. Пер. З. Буниятова, Баку, 1981, с. 82, примеч. 80 և В. М и н о р с к и й, Նշվ. աշխ., էջ 132:

²⁵ Ա. Ե ղ ի ա զ ա բ յ ա ն. Նշվ. աշխ., էջ 103:

²⁶ *Տե՛ս* ابن الأثير, IV, էջ 216:

²⁷ Этническая карта Дагестанской АССР.— "Народы Кавказа", с. 416, карта.

²⁸ J a c u t, I, S. 438-439, III, S. 933.

²⁹ Նույն տեղում, IV, էջ 686: Մուղանն Ատրպատականի ոստիկանության կազմում են հիշատակում նաև իբն Խորդադբեհը (BGA, VII, p. 119), իբն ալ-Ֆակիհն (BGA, V, p. 285) ու ալ-Իսթախրին (BGA, I, p. 182):

³⁰ BGA, VI, p. 121.

³¹ Բագդ երկրի աշխարհագրական դիրքի մասին Մասուդիին հաղորդում է Երասխ գետի մասին հիշատակելիս. «Ար-Բասը հոսում է Բագդայն երկրի, որը Խուրամյան Բաբաքի Հայրենիքն է Ադարբայջանում, և Ջաբալ Աբի Մուսա երկրի միջև, որն Առանի մասերից է»

Իբն ալ-Ֆակիհը վկայում է, որ «Աղարրայջանի (Ատրպատականի ոստիկանության) սահմանները մինչև ար-Ֆաս (Երասխ) են (տարածվում), իսկ Քուռն Արմինիայում է»³²: Երասխ գետի՝ Արմինիա և Ատրպատականի ոստիկանության սահման հանդիսանալու ապացույցն է նաև Ղևոնգի այն վկայությունը, որտեղ պատմիչը, նկարագրելով խազարների արշավանքը, տեղեկացնում է, որ նրանք «միաբանեալք ելանէին ընդ աշխարհն Հոնաց և ընդ պահակն Ճորայ...», անցանէին ընդ գետն Երասխ յերկիրն Պարսից (Ատրպատական, ավելի ստույգ՝ Ատրպատականի ոստիկանություն)»³³: Վերջինիս կազմում VIII դ. պատմիչը հիշատակում է Մեծ Հայքի Փայտակարան աշխարհի դավառները³⁴:

Շարունակելով Արմինիայի հարավային սահմանների քննությունը՝ անհրաժեշտ է նշել, որ չնայած հայագիտության մեջ արմատավորված այն տեսակետին, թե Մեծ Հայքի թագավորության 387 թ. բաժանման ժամանակ Պարսկահայքն ամբողջությամբ հանվել է Մեծ Հայքից³⁵, սկզբնաղբյուրներում պահպանված տեղեկություններն ապացուցում են, որ նրա հյուսիսային հատվածը՝ սկսած Այլի դավառից մինչև Ջարեանդի հյուսիսային սահմանները³⁶, մտնում էր Հայոց մարզպանության մեջ: Թովմա Արծրունին պաշտոնը վկայում է, որ Այլի (էլի) դավառը մտնում էր Արմինիա ոստիկանության մեջ՝ հստակորեն այն տարբերելով Ատրպատականի ոստիկանությունից ու Պարսից կողմերից³⁷: Իսկ Եղիշեն էլ հազորդում է, թե 450–451 թթ. ապստամբությունը ճնշելու նպատակով եկած պարսկական բանակը «հասանէր յաշխարհն Հայոց ի Հեր և ի Ջարեանդ գաւառ»³⁸: Եղիշեի վկայությունն ուղղակի արձանագրումն է Հեր և Ջարեանդ գավառների՝ Հայոց մարզպանության կազմում լինելու փաստի: Աշխարհագրական առումով Հայոց մարզպանության կազմում պետք է մնացած լինեի նաև Պարսկահայքի Այլի և Ջարեանդ գավառների միջև ընկած հատվածը³⁹: Երբ արարները նվաճեցին Այսրկովկասյան երկրները, նրանք պահպանեցին Ասսանյան Պարսկաստանի վարչական բաժանումը և Պարսկահայքի նշյալ դավառները մաս կազմեցին Արմինիա ոստիկանության: Ա-

(տե՛ս Կ-Կ¹⁰⁰, էջ 206): Ջարալ Աբի Մուսա (Աբի Մուսայի լեռ) ասելով՝ Մուսադին նկատի ունի Արցախի լեռների հարավային շրջանները, որտեղ Գորջ (Գտիշ) ամրոցում Եսայի Աբու Մուսե Առանչահիկ իշխանը հերոսական կռիվներ մղեց Բուղայի զորամասերի դեմ (տե՛ս Թովմա Արծրունի և Անանուն. Պատմութիւն տանն Արծրունեաց. Երևան, 1985, էջ 276–278 և Հայ ժողովրդի պատմություն. հ. Բ, Երևան, 1984, էջ 358): Փաստորեն, Բադըր հարավից հարևան էր Մեծ Հայքի Արցախ աշխարհին:

³² BGA, V, p. 296:

³³ Պատմութիւն Ղևոնգեայ Մեծի վարդապետի Հայոց (այսուհետև՝ Ղևոնգ). Ս. Պե-սերրուրդ, 1887, էջ 101:

³⁴ Ն. Ա դ ո ն ց. Հայաստանը Հուստինիանոսի դարաշրջանում (թարգմ. ուսերենից Ա. և Է. Խոնդկարյանների), Երևան, 1987, էջ 254:

³⁵ Պարսկահայքի այդ հատվածն ընկած է պատմական Մարի գետի (այժմ Բարանդուղ-չայ) և Ջեյրավանդ բնակավայրի միջև (Բ. Հ ա Ր ու թ յ ու ն յ ա ն. Մեծ Հայքի վարչա-քաղաքական բաժանման համակարգն ըստ «Աշխարհացոյց»-ի. Երևան, 2001, էջ 313–323: Տե՛ս նաև ն ու յ ի՝ Հայաստանն ըստ «Աշխարհացոյց-ի և այլ աղբյուրների» քարտեզը, Երևան, 2001):

³⁶ Թովմա Արծրունի և Անանուն, էջ 232:

³⁷ Եղիշե. Վասն Վարդանայ և Հայոց պատերազմին (այսուհետև՝ Եղիշե), Երևան, 1989, էջ 212:

³⁸ Այդ մասին մանրամասնորեն տե՛ս Բ. Հ ա Ր ու թ յ ու ն յ ա ն. նշվ. աշխ., էջ 347–351:

րաբ Հեղինակները տեղեկություններն արտացոլում են այդ իրողությունը: Իբն Խորդադբեհը Հազորդում է, որ Արմինիա ոստիկանության կազմում ընդգրկված էր Պարսկահայքի Հեր (արաբ. Խուայյ) գավառը³⁹, իսկ ալ-Մուկադդասին էլ վկայում է, որ Արմինիայի կազմում ընդգրկված էին Հերը, Սալմաստն (Սալմաս) ու Ուրմիոն⁴⁰:

Սակայն արաբական տիրապետությունն իր հետ բերեց նաև որոշ փոփոխություններ: Երբ Արմինիայի այս կամ այն մասում հաստատվում էին արաբ իշխանավորներ կամ վերաբնակիչներ և հիմնադրում իրենց իշխանությունները, նրանք վարչականորեն ենթարկվում էին Արմինիայի ոստիկանին: Ուստի և ավելի ուշ Հայոց թագավորներն ու իշխաններն իրենց իրավունքն էին համարում նրանց իրենց ենթարկելը: Կոստանգին Միրանածինը Հազորդում է, որ Աշոտ I-ի իշխանությունը ճանաչում էին Հերի և Սալմասի (Սալմաստ) արաբ իշխանները⁴¹: Իսկ Հովհաննես Դրասխանակերտցին պատմում է, որ «(Գրիգոր-Դերենիկ Արծրունին) ձեռն զգալաբուն և զքաղաքքն արկեալ զկողմամբ Հերայ և Ջարալանդայ՝ ի հնազանդութիւն ընդ իւրեալ զկողմանսն զայնոսիկ նուաճէր»⁴²: Բայց արաբների հաստատումն Արմինիայի տարբեր մասերում փոփոխություններ էր մտցնում ժամանակակիցների մտածողության մեջ: Այն ստիպում էր, որ մի քանի այլ աղբյուրներում Պարսկահայքի հյուսիսային գավառները համարվեն Ատրպատականի մաս: Ղևոնդը, օրինակ, նկարագրելով արաբների անընդհատ սաստկացող բռնությունները, պատմում է, թե Գագիկ Արծրունին հավաքեց իր զորքը և «ելեալ ասպատակ սփռէր զկողմամբ Ատրպատական աշխարհին, ի Ջարեանդ գալառ, ի Բուտակս⁴³ և Ջիղուոյ, ի Տասուկ⁴⁴, ի Գաղնակ, ի Յորմի, ի Սուրենապատ և յայլ ևս մերձակայ գալառսն... և գայր հասանէր ի գալառն Հէր»⁴⁵: Ըստ Յակուտի՝ Հերը, Ջարեանդը, Սալմաստը և Ուրմիոն նույնպես Ատրպատականի մաս էին կազմում⁴⁶:

Քանի որ արաբ նվաճողները հիմնականում պահպանում էին Սասանյան Պարսկաստանի վարչական բաժանումը, ապա անհրաժեշտ է պարզաբանում մտցնել Հայագիտության մեջ արմատավորված ևս մեկ, մեր կարծիքով, սխալ տեսակետի հարցում, թե 387 թ. բաժանման ժամանակ Մեծ Հայքից առանձնացվել էր նաև Կործայք աշխարհն ամբողջությամբ⁴⁷: Ելնելով Հայկական սկզբնաղբյուրների և, մասնավորապես, Եղիշեի տվյալնե-

³⁹ BGA, VI, p. 122.

⁴⁰ Al - M o q a d d a s i. Kitāb ahsān at-takhasim fi mārifat al-akhalim. - BGA, III, p. 51.

⁴¹ Օտար աղբյուրները Հայաստանի և Հայերի մասին, Բյուզանդական աղբյուրներ, Ի, Կոստանդին Միրանածին (Թարգմ. բնագրից, առաջարան և ծանոթ. Հ. Բարթիկյանի), Երևան, 1970, էջ 10:

⁴² Յովհաննու կաթողիկոսի Դրասխանակերտցույ Պատմություն Հայոց (Թարգմ. և ծանոթ. Գ. Թոսունյանի), Երևան, 1996, էջ 142:

⁴³ Ավելի ճիշտ՝ Ռոտակ կամ Ռոստակ: Ռոտակի եպիսկոպոսությունը Համապատասխանում էր Հեր և Ջարեանդ գավառներին (Բ. Հ ա ղ ո լ թ յ ո լ ն յ ա ն. նշվ. աշխ., էջ 348):

⁴⁴ Տասուկը (Տասվիլ) գտնվում էր Ուրմիո լճի հյուսիսային ափին (Ս. Ե Ր Ե Մ Յ Ա Ն. Հայաստանը և... քարտեզ):

⁴⁵ Ղևոնդ, էջ 133-134:

⁴⁶ J a c u t, I, S. 171-175, 219, 513, II, S. 502, 922, 959, III, S. 120.

⁴⁷ Ն. Ա Ղ Ո Ն Գ. նշվ. աշխ., էջ 255:

րից, ի հայտ է գալիս այն իրողությունը, որ, չնայած Հայ Արշակունիների թագավորության անկումից առաջ և հետո Մեծ Հայքի տարածքային մեծ կորուստներին, Հայոց մարզպանության կազմում շարունակեցին մնալ Կորճայքի Կորդիք և Տմորիք երկրամասերը: Եղիշեն վկայում է, որ Ավարայրի ճակատամարտից հետո Տմորիքի անառիկ ամրոցներում ապաստանած հայերը, երբ լսեցին պարսից զորքի գործած չարիքների մասին, «քաջութեամբ ելեալ յարձակեցան օգնականութեամբ ամրականացն, և հասեալ ի մօտաւոր աշխարհն Պարսկաց, յանխնայ կոտորելով նախճիրս արեան գործէին»⁴⁸: Այս տեղեկությունը հստակորեն խոսում է այն մասին, որ պարսկական երկրամասերի հետ սահմանակից Տմորիքը Հայոց մարզպանության մաս էր կազմում: Ելնելով պատմաաշխարհագրական պայմաններից, անկասկած, մարզպանության կազմի մեջ պետք է մտնել նաև Կորդիքը⁴⁹: Ինչ վերաբերում է այդ երկրամասերի տեղադրությանը, ապա այդ խնդրում մեծ է Փավստոս Բուղանդի հաղորդած տեղեկությունների դերը: Պատմիչի վկայությամբ՝ Հայոց Արշակ II թագավորի դեմ ապստամբած երկրամասերի մեջ էին «և ամուր գաւառն Տմորեաց, և ամուր աշխարհն Կորդեաց. ապա և տէր գաւառին Կորդուաց չոգաւ եկաց առաջի թագաւորին Պարսից»⁵⁰: Ապա, կապված Մուշեղ Մամիկոնյանի ձեռնարկած պատժիչ արշավանքի հետ դեպի Հայոց արքայի դեմ ապստամբած երկրամասերը, պատմիչը հաղորդում է, որ «հարկանէր Մուշեղ սպարապետն...դ Կորդուս և զԿորդիս և զՏմորիս»⁵¹: Ակնհերև է, որ պատմիչը լավ է պատկերացնում հիշյալ երեք երկրամասերի տեղադրությունը, հիշատակելով մի դեպքում արևելքից արևմուտք, իսկ երկրորդ անգամ՝ արևմուտքից արևելք: Անհրաժեշտ է նշել, որ Մովսես Խորենացին, անդրադառնալով Արտաշես I-ի դայակ Սմբատ Բագրատունու գործունեությանը, հաղորդում է, որ վերջինս «հրամանաւ Արտաշիսի բնակէ ի Տմորիս, որ այժմ կոչի Կորդիք, ի յԱլկի նստուցեալ զբազմութիւն գերւոյն»⁵²: Այսինքն՝ չնայած այն բանին, որ Փավստոս Բուղանդը հստակորեն միմյանցից տարբերակում է Կորդիքն ու Տմորիքը, պատմահայրը հակված է գրանք նույնացնելու: Քանի որ նա քաջածանոթ էր Հայաստանի աշխարհագրությանը, ապա չպետք է կարծել, թե նա կարող էր սխալ թույլ տալ: Ուստի, հավանական է, որ սկզբնապես Կորդիքն Ալկի ամրոցով⁵³ եղել է Տմորիքի մի հատվածը, իսկ հետագայում Խորենացու ժամանակներում, բաժանվել է գրանից և հեղինակը, պատմելով Սմբատի՝ Տմորիքի Ալկի ամրոցում հաստատվելու մասին, միաժամանակ անհրաժեշտ է համարել հիշատակել իր ժամանակների իրողությունը,

⁴⁸ Ե Ղ Ի Ն Ե, էջ 254:

⁴⁹ Б. А р у т ю н я н. Административное деление закавказских владений Сасанидского Ирана согласно труду Елишэ.— «Кавказ и Византия», вып. I, Ереван, 1979, с. 25.

⁵⁰ Փաւստոսի Բիւզանդացւոյ Պատմութիւն Հայոց (բնագիրը Ք. Պատկանյանի), Երևան, 1987, էջ 246:

⁵¹ Նույն տեղում, էջ 320:

⁵² Մովսիսի Խորենացւոյ Պատմութիւն Հայոց. Երևան, 1981, էջ 218:

⁵³ Բեյթուլ-Շարաբ գետակի վերին հոսանքի ավազանում պահպանվել է էլք անունով մի գյուղ, որն ուսումնասիրողները նույնացնում են Խորենացու հիշատակած Ալկիին (Ս. Երեմյան, նշվ. աշխ., էջ 32):

թե Տմորիքի այն հատվածը, որտեղ գտնվում էր Ալկին, այժմ կոչվում էր Կորդիք⁵⁴: Փավստոս Բուզանդի տեղեկություններից կարելի է եզրակացնել, որ աշխարհագրական տեսակետից Կորդուքից արևելք գտնվել է Կորդիքը՝ Բեյթ-ուլ-Շարաբ գետակի հովտում⁵⁵, իսկ դրանից էլ արևելք գտնվել է Տմորիքը՝ Մեծ Ջաբ գետի միջին ավազանի շրջանում⁵⁶: Այնպես որ, ըստ ամենայնի, Տմորիք գավառն իր կազմում ընդգրկում էր նաև Կորճայք աշխարհի՝ Կորդիքից արևելք ընկած հյուսիսային գավառները՝ Ճահուկը, Փոքր Աղբակն ու Որսիբանքը⁵⁷: Քանի որ արաբները հիմնականում պահպանում էին Սասանյանների վարչական բաժանումը, ապա հիշյալ գավառները մտան նրանց ստեղծած Արմինիա ոստիկանության կազմի մեջ: Արարական տիրապետության շրջանում Արծրունի իշխաններն աստիճանաբար շարժվում են հարավ և իրենց իշխանության մեջ ընդգրկում նաև այդ գավառները: Արդեն Բուղայի արշավանքի ժամանակ Արծրունիների իշխանության տակ էին Ջլմար, Սրինգ և Ճահուկ ամրոցները⁵⁸: Վերջիններից Ջլմարն ու Սրինգը գտնվում էին Փոքր Աղբակ գավառում, իսկ Ճահուկը՝ Ճահուկ գավառում⁵⁹: Բուղայի արշավանքների և հետագա ժամանակաշրջանում արդեն այս գավառները մեծ կարևորություն են ձեռք բերում Արծրունիների համար: Երբ ապօրինաբար Վասպուրականի իշխան դարձավ Վասակը, Գուրգեն Արծրունին «ելեալ փութանակի եկն եհաս յաշխարհս Վասպուրական: Եւ այն ինչ ընդ մտանելն՝ երազապէս հասեալ ի վերայ ամրոցացն Ջլմար և Սրինգ կոչեցեալ՝ յինքն գրաւէ գամրոցսն. և կալեալ զՎասակ՝ յինքն գրաւեաց զգօրավարութիւնն բոլոր Վասպուրական տէրութեանս»⁶⁰:

Ըստ Թովմա Արծրունու՝ Փոքր Աղբակից արևելք գտնվող Որսիբանք գավառը նույնպես LX դ. Արծրունիների իշխանության մաս էր կազմում: Արյան լճի ճակատամարտի նախօրեին Գուրգեն Արծրունու գլխավորությամբ այստեղ են ապաստանում Վասպուրականի մեծամեծներն ու փախստական բնակչությունը և պարտության մատնում թշնամուն⁶¹: Թովմա Արծրունու հետագա վկայություններից երևում է, որ Կորդվաց լեռների շրջանում գտնվող այս գավառները հետագայում էլ մտնում էին Արծրունիների իշխանության մեջ:

⁵⁴ Բ. Հ ա ռ ու թ յ ու ն յ ա ն. նշվ. աշխ., էջ 282-283:

⁵⁵ Б. А р у т ю н я н. նշվ. աշխ., էջ 24-25: «Աշխարհացոյց»-յան Կորդիք Վերին, Կորդիք Միջին և Կորդիք Ներքին գավառների (տե՛ս Աշխարհացոյց Մովսեսի խորհանգացոյ յաւելուածովք նախնեաց. Վենետիկ, 1881, էջ 32) անվանումները ցույց են տալիս, որ անցյալում այս գավառների ամրոցությունը կրել է միասնական Կորդիք անունը: Այս գավառների «Աշխարհացոյց»-յան նկարագրության աշխարհագրական հերթականությունը վկայում է հօգուտ դրանց Արևելյան իսրայել գետի Բեյթ-ուլ-Շարաբ վտակի ավազանում տեղադրության (տե՛ս Բ. Հ ա ռ ու թ յ ու ն յ ա ն. նշվ. աշխ., էջ 278): Նման եզրահանգման հիմք է հանդիսանում այն, որ Մովսես խորհանգին, ինչպես տեսանք, Բեյթ-ուլ-Շարաբ գետակի վերին հոսանքի ավազանում գտնվող Ալկի ամրոցը հիշատակում է Կորդիքում:

⁵⁶ Բ. Հ ա ռ ու թ յ ու ն յ ա ն. նշվ. աշխ., էջ 280-281:

⁵⁷ Նույն տեղում, էջ 281-282:

⁵⁸ Թ ո վ մ ա Ա ռ ծ ը ու ն ի և Ա ն ա ն ու ն, էջ 212:

⁵⁹ Բ. Հ ա ռ ու թ յ ու ն յ ա ն. նշվ. աշխ., էջ 290-292:

⁶⁰ Թ ո վ մ ա Ա ռ ծ ը ու ն ի և Ա ն ա ն ու ն, էջ 306:

⁶¹ Նույն տեղում, էջ 224-232:

Այսպիսով, Արմինիան հարավում ընդգրկում էր նաև Մեծ Հայքի Կորճայք աշխարհի Ճահուկ⁶², Փոքր Աղբակ⁶³ և Որսիրանք⁶⁴ դավառները: Փաստորեն, հարավում Արմինիա ոստիկանության սահմանները տարածվում էին մինչև Կորդվաց (այժմ՝ Հաքյարի) լեռների շրջանը՝ ընդգրկելով այդ լեռների հարավային լեռնաբաղուկները:

Արմինիա ոստիկանության մեջ ընդգրկված էր նաև Մեծ Հայքի Մոկաց աշխարհը: Արար պատմիչ Բալազուրին հաղորդում է, որ այն Վասպուրականի իշխանության մաս էր կազմում⁶⁵: Այդ հազորդման պատճառը Սասանյանների տիրապետության ժամանակաշրջանում ձևավորված վարչաքաղաքական իրավիճակի արտահայտությունն էր: Նախքան 591 թ. Հայաստանի բաժանումը Սասանյան Պարսկաստանի և Բյուզանդիայի միջև Մոկաց աշխարհը մտնում էր Հայոց մարզպանության Տանուտիրական գնդի մեջ: Բաժանումից հետո Հայաստանի մեծ մասն անցավ Բյուզանդիային, իսկ Հայոց մարզպանությունը համարժեք դարձավ Սեպակական կամ Վասպուրական գնդի երկրին և իր մեջ ներառում էր միայն Վասպուրականը, Մոկքը, Պարսկահայքի ու Կորճայքի որոշ հատվածներ և Դվին քաղաքն իր շրջակայքով⁶⁶: Վասպուրական աշխարհի դադափարին աստիճանաբար փոխարինում էր Վասպուրական-Հայոց մարզպանությունը դադափարը⁶⁷, որի հետևանքով էլ Բալազուրին Մոկաց աշխարհը Վասպուրականի մաս է համարում:

Մոկաց աշխարհից ավելի արևմուտք IX դ. առաջին կեսին արդեն Արմինիա ոստիկանության մաս էր կազմում Սասունը: Աղձնիքի Հյուսիսային լեռնային շրջանները, և, հատկապես, Սասունը, գտնվելով Զաղիրա ոստիկանության Դիար Բաքր երկրամասի կազմում, կիսանկախ վիճակ էին պահպանում, և հաճախ մի փոքրիկ ճնշումը բավական էր լինում, որ տեղի ազատասեր հայուհյուները ոտքի ելնեին, ինչպես դա տեղի ունեցավ 749-752 թթ.⁶⁸: Այս ապստամբությունն այն նշանակություն ունեցավ, որ դրանից

⁶² Ճահուկը գտնվել է Ջուլամբրեկից ոչ հեռու գտնվող Ագարակ-դաղ լեռների շրջանում (Հ. Մ ա Ր Կ Վ ա Ր տ. Պարսկահայք նահանգը. — «Պատմա-բանասիրական հանգես» (այսուհետև՝ ՊՔՀ), 1961, №1, էջ 193): Այդ լեռները գտնվում են Բեյթ-ուլ-Շաբաբ գետակի սկզբների շրջանում:

⁶³ Փոքր Աղբակի արևմտյան սահմանը Ճահուկ դավառի հետ կազմել է Լևին գետակի արևելյան ջրբաժանը, հյուսիսում՝ Ագարակի լեռներից և Կոհ-ի-Նիհորական լեռնաշղթայից սկիզբ առնող լեռնաբաղուկները, որոնք Ակեն բաժանում են Փոքր Աղբակից, հարավում Ջողա լեռների ջրբաժան գիծն, իսկ արևելքում՝ Որսիրանք դավառը (Բ. Հ ա Ր ու լ - թ յ ու լ յ ա ն. նշվ. աշխ., էջ 292):

⁶⁴ Հ. Մարկվարտը, հենվելով այս տեղեկության, ինչպես նաև Վալդեման Բեյքի տեղաբնական հետազոտության արդյունքների վրա, որի ընթացքում վերջինը հայտնաբերել էր Արյան լիճը, Որսիրանքը տեղադրում է Նեհիլ գետի ավազանում, որտեղ գտնվում է Գյավառի դաշտը (Հ. Մ ա Ր Կ Վ ա Ր տ. նշվ. աշխ., էջ 189-190): Վալդեման Բեյքը Գյավառի կազմի Դիգա դյուզի մոտ հայտնաբերել էր Արյան լիճը, որը մեր օրերում ճահճուտի է վերածված (Բ. Հ ա Ր ու լ - թ յ ու լ յ ա ն. նշվ. աշխ., էջ 288):

⁶⁵ بلانزى, I, էջ 236:

⁶⁶ Б. А р у т ю н я н. նշվ. աշխ., էջ 19-35:

⁶⁷ Բ. Հ ա Ր ու լ - թ յ ու լ յ ա ն. նշվ. աշխ., էջ 401-402: Հայոց մարզպանության Սասանյան Պարսկաստանի տիրապետության տակ 591 թ. բաժանումից հետո մնացած հատվածը, դատելով սեբեոսի վկայություններից, պաշտոնապես ստացել էր Վասպուրական գնդի կամ Վասպուրական երկրի անվանումը (Ա ե բ ո ս. էջ 84, 166):

⁶⁸ Ա. Տ ե Ր - Ղ և ո ն դ յ ա ն. Սասունի 749-752 թվականների անհայտ ապստամբությունը իսլամաբանության դեմ. — ՊՔՀ, 1971, №3, էջ 196-202:

Հետո Սասունն աստիճանաբար անջատվեց Ջազիրայից ու միացավ Արմինիա ոստիկանությանը: Արար Հեղինակների վկայություններից ակնհայտ է դառնում, որ IX դ. առաջին կեսին արդեն Սասունը վարչականորեն Արմինիա ոստիկանության կազմի մեջ էր մտնում: Ոստիկանի սպանության առիթով Իբն ալ-Ասիրը սասունցիներին պարզապես կոչում է «Արմինիայի բնակիչներ»: Խոսելով այն մասին, թե ինչպես Արմինիայի և Ատրպատականի կառավարիչ նշանակված Աբու Սայիդը (Աբուսեթ) հանկարծամահ եղավ, և նրա փոխարեն Մուտավաքիլը նշանակեց նրա որդուն, Իբն ալ-Ասիրը պատմում է, թե «այդ տարում (Հիջրի 237 թ.: 851-852) Հայաստանի (Արմինիա) ժողովուրդն ապստամբեց իր կառավարիչ Յուսուֆ իրն Մուհամմադի դեմ և սպանեց նրան»⁶⁹: Ի միջի այլոց, հարկ է նշել, որ այդ սպանության զրդպատճառը ոստիկանի կողմից Տարոնի Բագարատ Բագրատունի իշխանի գերեզմանը ոստիկանի կողմից Տարոնի Բագարատ Բագրատունի իշխանության տակ ունեցող Սասունը, որը, թերևս, միացվել էր VIII դ. վերջին Բագրատունյաց տիրույթ դարձած Տարոնին: Համենայնդեպս, թովմա Արծրունու՝ այս ապստամբության մասին պատմածից երևում է, որ լեռնային այդ շրջանն այն ժամանակ մտնում էր Բագարատ Բագրատունու տիրույթների մեջ: Պատմիչը վկայում է, որ «յայնժամ բնակիչք լերինն իբրև տեսին, թէ վարեցաւ իշխանն (Բագարատ Բագրատունին) ի գերութիւն, ինքեանք պատրաստեալ են զնոյն փարշմանն կրել զոր դաշտայինքն կրեցին:...Եւ անդէն իսկ և իսկ փութացաւ, եհաս գուժկան առ թագաւորն, եթէ սպանաւ զօրավարն քո և ապստամբաց ի պետութենէ քումմէ աշխարհն Հայոց»⁷⁰: Դուրս է գալիս, որ այդ ժամանակ Տարոնը և Սասունը կազմում էին Բագարատի մեկ միասնական տիրույթի երկու՝ դաշտային և լեռնային հատվածները:

Արմինիա ոստիկանության արևմտյան սահմանները սերտորեն կապված էին արաբա-բյուզանդական սահմանային ամրությունների գոտու հետ: Յակուտը հազորդում է, թե բոլոր տարածքները, որոնք հարևան են թշնամու երկրին (Բյուզանդիային) և որտեղից կատարվում են արշավանքներ դեպի այդ երկիրը, կոչվում էին սուղուր⁷¹: Սահմանային ամրությունների գոտին ձևավորվել էր արաբա-բյուզանդական անընդհատ պատերազմների ընթացքում և տարածվում էր Միջերկրական ծովի ափերից մինչև Բարձր Հայքի Կամախ քաղաքը: Այդ գոտին բաղկացած էր երկու մասից՝ Կիլիկիայի (Ասորիքի սահմանային ամրություններ) և Միջագետքի (Ջազիրայի սահմանային ամրություններ): Վերջինիս կազմում ընդգրկված էին Մեծ Հայքի Բարձր Հայք ու Չորրորդ Հայք (Մոփք) աշխարհների արևմտյան դավառները և Փոքր Հայքի հարավային հատվածը՝ Մալաթիա քաղաքով⁷²:

Դատելով աղբյուրների տեղեկություններից՝ սահմանային ամրությունների գոտու հետ սերտ կապերի մեջ էր Արմինիա ոստիկանության Չորրորդ Արմինիա երկրամասը, որի կազմի մեջ էին մտնում Կարնո քաղաքը

⁶⁹ ابن الاثير, V, էջ 288:

⁷⁰ Թ ո վ մ ա Ա ր ծ ր ու ն ի և Ա ն ա ն ու ն, էջ 190:

⁷¹ J a c u t, I, S. 927.

⁷² Արաբա-բյուզանդական սահմանային ամրությունների գոտու մանրամասն քննությունը տես՝ Ա. Տ ե ր - Ղ և ո ն դ յ ա ն. Արաբա-բյուզանդական սահմանային ամրությունների գոտին (Սուղուր). - ՊԲՀ, 1981, № 2, էջ 134-149:

(արաբ. Կալիկալա) Բարձր Հայքում և Արշամաշատ քաղաքը (արաբ. Շիմ-շաթ)՝ Մոփքում: Վերջիններս, սուղուրի մեջ մտնող Մալաթիայի և Կամախի հետ առաջնային հենակետեր էին արաբների համար: Աղբյուրներում բազմաթիվ տեղեկություններ են պահպանվել այն մասին, որ բյուզանդացիներն անընդհատ արշավում էին դեպի սուղուր, գրավում ու ավերում էին այնտեղի քաղաքներն ու ամրությունները, բնակչությանը գերեզմարում էին ու նահանջում, իսկ արաբները վերականգնում էին դրանք, նոր ամրություններ կառուցում և նոր արաբ վերաբնակիչներ բերում⁷³: Բալագուրին, օրինակ՝ վկայում է, որ Կամախ քաղաքը մի քանի անգամ ձեռքից ձեռք էր անցել⁷⁴: Սահմանային ամրությունների գոտում արաբների կարևորագույն հենակետը Մալաթիան էր: Այն արաբական զորքերի՝ դեպի Բյուզանդիա կատարվող ամառային արշավանքների ելակետն էր և, հաճախ դառնալով բյուզանդական հարձակման թիրախ, ավերվում էր⁷⁵: Արաբական աղբյուրներում հիշատակվող Անձիտ գավառում, որը սահմանային ամրությունների գոտու մաս էր կազմում⁷⁶, գտնվում էին Անձիտ և Խարբերդ (Հիսն Ջիտոդ) բերդերը⁷⁷:

Չորրորդ Արմինիայի կազմում գտնվող Կարնո քաղաքը Բյուզանդիայի դեմ պայքարում արաբների համար կարևորագույն հենակետային ամրոցներից մեկն էր: Բալագուրին հաղորդում է, որ Կարնո քաղաքը գրավել էր Հաբիբ իբն Մասլաման և, հասկանալով նրա կարևոր ռազմավարական դիրքը Բյուզանդիայի դեմ մղվող պայքարում, այստեղ էր վերաբնակեցրել բավական թվով արաբների⁷⁸: Չորրորդ Արմինիայի կազմում ընդգրկված էր նաև Արշամաշատը: Դատելով Բալագուրիի տեղեկություններից՝ այն իր շրջակայքով վարչականորեն առանձին միավոր էր համարվում և ուներ զինվորական առանձին կառավարիչ⁷⁹:

Անդրադառնալով Արմինիայի և սահմանային ամրությունների գոտու միջև սահմանագծին՝ նշենք, որ արաբական աղբյուրները, ինչպես վերևում տեսանք, բավական հաճախ են անդրադարձել այդ գոտում գտնվող Կամախին: Յակուտը վկայում է, թե Մոփքի Անձիտ գավառը ևս մտնում էր այդ գոտու մեջ⁸⁰: Իսկ վերջինիս անմիջապես հարևանությամբ գտնվող Արշամաշատ քաղաքն, ինչպես տեսանք, մաս էր կազմում Արմինիա ոստիկանությանը: Դատելով բնաշխարհագրական պայմաններից՝ սահմանային ամրությունների գոտու մեջ պետք է մտնեին Անձիտ գավառի և Կամախ քաղաքի միջև գտնվող Մոփքի և Բարձր Հայքի գավառները՝ Գավրեքը,

⁷³ Ղ և ո ն գ, էջ 129–130, Սամուէլի քահանայի Անեցույ Հաւաքմունք ի գրոց պատմագրաց (յառաջաբանով, համեմատութեամբ, յաւելուածներով եւ ծանօթութիւններով Ա. Տէր-Միքելեանի), Վաղարշապատ, 1893, էջ 89, 92, بلانري, I, էջ 236:

⁷⁴ بلانري, I, էջ 219–220:

⁷⁵ Նույն տեղում, էջ 221:

⁷⁶ J a c u t, IV, S. 993:

⁷⁷ Նույն տեղում, II, էջ 276, 417:

⁷⁸ بلانري, I, էջ 234:

⁷⁹ Նույն տեղում, էջ 220, 240: Տե՛ս նաև BGA, VI, p. 122:

⁸⁰ J a c u t, IV, S. 993.

Մոփքը (Մոփք Շահունի), Դեգիքը, Մուզուրը և Դարանաղին⁸¹: Դատելով ըստ ամենայնի՝ Արմինիա ոստիկանություն սահմանագիծը սահմանային ամրությունների գոտու հետ հարավից հյուսիս անցնելու էր սկզբում Արդնիի լեռներով, այնուհետև Արշամաշատ քաղաքի արևմտակողմով, ապա Մնձուր (Մուզուր) և Խոզաթ գետերի ջրբաժանով: Հետո սահմանագիծը հաղթահարելու էր Մնձուր լեռներն ու դուրս էր գալու Կամախի շրջակայքը: Ելնելով Կամախի մեծ կարևորությունից՝ Մնձուր լեռների դրանից դեպի արևելք ձգվող հատվածը ևս հարկ է ընդգրկել սահմանային ամրությունների գոտու մեջ:

Ըստ արաբ հեղինակների՝ Արմինիա ոստիկանությունն արևմուտքում սահմանակցում էր Արման երկրի հետ⁸²: Լեոն Արմանը նույնացնում է Փոքր Հայքին⁸³: Անվանի հայագետն այստեղ, ըստ երևույթին, կրկնել է արաբ աշխարհագետների երկերի թարգման Ն. Կարաուլովին⁸⁴: Մեր կարծիքով, խոսքն այստեղ, իրոք, վերաբերում է Փոքր Հայքին (ավելի ճիշտ, դրա հյուսիսային մասին), բայց մի կարևոր տարբերությամբ. ըստ էության, արաբ հեղինակներն այդպես էին կոչում իր սահմաններում Փոքր Հայքի հյուսիսային հատվածը և բյուզանդական Առաջին Հայք, Երկրորդ Հայք, Պոնտոս և Դամիդք նահանգներն ընդգրկող «Արմենիակ» բանակաթեմը⁸⁵: Սա առավել ընդունելի տեսակետ է, քանի որ այդ ժամանակաշրջանում Արմինիա ոստիկանության արևմտյան սահմանին հիշյալ տարածքներից որպես վարչատարածքային միավոր ձևավորված էր հենց Արմենիակ բանակաթեմը: «Արմենիակ» բանակաթեմը հիշատակում են նաև արաբ հեղինակները. Իբն Խորդադբեհը հիշատակում է «ալ-Արմանիակ թեմը, որի բերդերից են Կուլունիան (Կողոնիա) և էլի 16 բերդեր, Խալդիայի թեմը, որի սահմանն է Արմինիան»⁸⁶: Բալազուրին, խոսելով բյուզանդացիների տիրապետության տակ մնացած հայկական հողերի մասին, պատմում է, որ դրանք գտնվում են Արմանիակուսի իշխանի կառավարման տակ⁸⁷:

Դատելով Սեբեոսի մի վկայությունից՝ Կամախից դեպի արևելք արաբաբյուզանդական սահմանին էր գտնվում Դերջան քաղաքը: Երբ Թեոդորոս Ռատունու և Մուսավիայի միջև կնքված 652 թ. պայմանագրի հետևանքով Կոստաս III կայսրը (641–668) նույն թվականին արշավեց դեպի Հայաստան և «իբրև եհաս ի Դերջան, ընդ առաջ եղեն նմա արք իսմայելացիք և մատուցին նմա թուղթ յիշխանէն իւրեանց, որ էր դրեալ այսպէս, թե «Հայք իմ են, անդ մի՛ երթար. ապա թէ երթաս՝ ես դամ ի վերայ քոյ, և

⁸¹ Անհրաժեշտ է նշել, որ սահմանային ամրությունների գոտու մանրամասն քննության արդյունքում Ա. Տեր-Ղևոնդյանը նույնպես հանգել է այս եզրակացությանը (Ա. Տեր-Ղևոնդյան. Արաբական սահմանային..., էջ 141):

⁸² BGA, I, p. 181, I b n H a u k a I, Kitab surat at ard, BGA, III, p. 331.

⁸³ Տե՛ս Լ. Ե. Ն. Երկերի ժողովածու. Հ. Բ, Երևան, 1967, էջ 362:

⁸⁴ Н. А. Караулов. Сведения арабских писателей о Кавказе, Армении и Азербейджане. — "Сборник материалов для описания местностей и племен Кавказа", вып. 29, Тифлис 1901, с. 56–57, примеч. 7.

⁸⁵ Այս բանակաթեմի մասին ավելի մանրամասն տե՛ս Լ. Ե. Ն. Երկ. աշխ., էջ 401, 748–749, ծանոթ. 113: Ն. Ա. Ղևոնդյան. աշխ., էջ 231:

⁸⁶ BGA, VI, p. 108.

⁸⁷ بلادي، I, էջ 231:

առնեմ գքեզ որ անդրէն փախչել ոչ կարես»⁸⁸: Անհրաժեշտ է նշել, որ հայ-արաբական պայմանագրում, ամենայն հավանականությամբ, որոշակիորեն պետք է արձանագրվեին հարկատու դարձող երկրի սահմանները: Ուստի, այն վաստր, որ Բյուզանդիայի կայսրն արաբներից վերջնազիր ստացավ այն ժամանակ, երբ հասավ Դերջան, ցույց է տալիս, որ արաբներին հարկատու Հայաստանի հատվածի և Բյուզանդական կայսրության միջև սահման էր ճանաչվել Դերջանը: Այս տեսակետի համաձայն՝ սահմանը Կամախից գեպի արևելք անցնելու էր Եփրատ գետով մինչև Դերջան և, այնուհետև, Եփրատ և Ճորոխ դետերի ջրբաժանով բարձրանալու էր Հյուսիս, Ապեր քաղաքից գեպի արևելք հատեր Ճորոխը և հասներ Պարխարյան լեռների Վերջնբակ գագաթին:

Անցնելով Պոնտական, իսկ այնուհետև՝ Պարխարյան լեռներով, սահմանն Արմինիայի կազմում էր թողնում Մեծ Հայքի Տայք աշխարհը: Վերջինը, որն արաբ հեղինակները հիշատակում են Սիրաջի (Շիրակ) հետ, ընդգրկված էր Արմինիա ոստիկանության երրորդ Արմինիա երկրամասի կազմում: Այն իր լեռնային տեղանքի պատճառով հաճախ հենակետ էր ծառայում արաբների դեմ ապստամբած հայ նախարարների համար⁸⁹: Դատելով «Վրաց տարեգրության» մի հիշատակությունից՝ սահմանային ամրությունների գոտուց և Բարձր Հայքի Ապեր գավառից Հյուսիս Արմինիայի սահմանն անցնում էր Պարխարյան լեռների ջրբաժան գծով: Վրաց սկզբնաղբյուրը, պատմելով Լեոն իշխանի կողմից Աբխազական թագավորության հիմնադրման մասին, հաղորդում է, որ այդ ժամանակ (VIII դ. վերջին) Ատրներսեհ Բագրատունին տիրում էր ի թիվս այլ գավառների, նաև «Ասիսփորի»-ին⁹⁰, որը, ակնհայտորեն, համապատասխանում է Տայքի Արսեաց փոքր գավառին: Վերջինը Սասանյանների տիրապետության ժամանակաշրջանում հայոց մարզպանության մաս էր կազմում⁹¹, իսկ 774–775 թթ. ապստամբությունից հետո, փաստորեն, դարձավ Կղարջքում ապստանած հայ Բագրատունիների ճյուղի սեփականությունը⁹²: Իսկ Արսեաց փոքր գավառը, ըստ «Աշխարհացոյց»-ի՝ տարածվում էր «առ Պարխար լեռամբն»⁹³:

Անդրադառնալով երկրորդ Արմինիայի՝ Բյուզանդական կայսրության հետ սահմանին, պետք է նշել, որ սկզբում արաբական տիրապետությունը տարածվում էր ընդհուպ մինչև Սև ծովի ափերը: 697 թ. Լազիկայի իշխանն ապստամբել էր բյուզանդական գերիշխանության դեմ և հպատակվել արաբներին⁹⁴: Ըստ Թեոփանեսի՝ VIII դ. սկզբին արաբները տիրում էին

⁸⁸ Ս ե բ ե ո ս, էջ 165:

⁸⁹ Ղ և ո ն դ, էջ 26, 122-123:

⁹⁰ Матиане Картлиса. Перевод, введение и примечания М. Лорджипанидзе, Тбилиси, 1976, с. 28.

⁹¹ Ն. Ա դ ո ն ց. նշվ. աշխ., էջ 37, ծանոթ. 2:

⁹² Հալաբուսեան պատմութեան Վարդանայ Վարդապետի. Վենետիկ, 1862, էջ 83–84:

⁹³ Աշխարհացոյց Մովսեսի Խորենացու, էջ 35:

⁹⁴ Օտար աղբյուրները..., Բյուզանդական աղբյուրներ, Դ, Թ ե ո փ ա ն ե ս ի ն ո ս - տ ո վ ա ն ո ղ (այսուհետև՝ Թ ե ո փ ա ն ե ս). Երևան, 1983, էջ 82: Очерки истории Грузии, т. II, Тбилиси, 1988, с. 173–174.

Աբազգիային (Աբխազիա), Լազիկային (Եգեթ) և Իրերիային⁹⁵: Վերջիններիս ամրոցներում այդ ժամանակ արաբական կայազորներ էին տեղակայված: Օրինակ՝ Ձախար ամրոցի պաշտպանության համար, որն իր ամրութայան պատճառով կոչվում էր «երկաթյա» (կարծում են, թե այն նույնական է Ձխալտա ամրոցին, որը գտնվում է Կոգոր գետի վերին հոսանքում, Ձխալտյան գետակի և Կոգոր գետի ջրկիցի մոտակայքում⁹⁶), արաբների կողմից նշանակվել էր ոմն Փարեսման⁹⁷:

Ընդհանրապես, Թեոփանեսի վկայություններից երևում է, որ VIII դ. սկզբին բյուզանդացիների ձեռքում էին գտնվում միայն Սև ծովի արևելյան ափամերձ շրջանները, որտեղից նրանք արշավանքներ էին կատարում դեպի արևելք՝ արաբներին արտաքսելու նպատակով: Ի վերջո, VIII դ. 30-ական թվականների սկզբին, Լևոն Իսավրացի կայսրը հարձակման անցավ և վերականգնեց Բյուզանդական կայսրության իշխանությունը Եգեթում, Ափշիլքում և Աբխազիայում⁹⁸: Այն, որ VIII դ. 30-ական թվականների սկզբին Եգեթն, Ափշիլքը և Աբխազիան դուրս էին եկել արաբական գերիշխանությունից, պարզվում է թեկուզ 735 թ: Մարուան իբն Մուհամմադի գլխավորությամբ արաբական նոր, մեծ արշավանքի իրողությունից, որը այդ երկրներում արաբական տիրապետությունը վերականգնելու վերջին քայլը եղավ, բայց ավարտվեց անհաջողությամբ⁹⁹: Դրանից հետո արաբական տիրապետությունը սահմանափակվեց այն տարածքում, որն արաբ հեղինակներն անվանում են Երկրորդ Արմինիա:

Փաստորեն, Երկրորդ Արմինիայի արևմտյան սահմանի վերջնական ձևավորումից հետո այն շորոխ գետից դեպի հյուսիս պետք է անցներ Մոսքական լեռներով (այժմ՝ Մեսխեթի լեռներ), որից դեպի հյուսիսարևմուտք գտնվող դաշտավայրային շրջանները գրավվել էին Բյուզանդիայի կողմից: Այստեղից դեպի հյուսիս, ըստ «Վրաց տարեգրության»՝ սահմանն անցնում էր Լիխի լեռնաշղթայով մինչև Ալանաց դռան ամրությունների շրջանը: Լիխի լեռնաշղթայից դեպի արևմուտք գտնվող շրջանները մտնում էին Աբխազական իշխանության մեջ, որի իշխան Լեոնը VIII դ. վերջին հիմնեց Աբխազական թագավորությունը¹⁰⁰: «Վրաց տարեգրություն»-ը վկայում է, թե Լեոնը, որը ժառանգել էր Աբխազական իշխանությունը, մոր կողմից խազարների արքայի թոռն էր և վերջինիս օգնությամբ էլ դուրս եկավ բյուզանդական գերիշխանությունից ու, «տիրելով Աբխազեթիին ու Էգրիսիին մինչև Լիխի, Աբխազաց արքա կոչվեց»¹⁰¹: Վրաց պատմիչ Ջվանշերը հաստատում է, որ Լիխի լեռները սահման էին

⁹⁵ Նույն տեղում, էջ 102:

⁹⁶ Очерки истории Грузии, т. II, с. 174, 387.

⁹⁷ Թ Ե Ռ Փ Ա Ն Ե Ա, էջ 104:

⁹⁸ Очерки истории Грузии, т. II, с. 175.

⁹⁹ Ջուանշերի պատմչի համառոտ պատմություն վրաց (այսուհետև՝ Ջ վ ա ն շ ե Ր). Վենետիկ, 1984, էջ 100:

¹⁰⁰ Очерки истории Грузии, т. II, с. 250, 281.

¹⁰¹ Матиане Картлиса, с. 28. Ավելի ուշ շրջանում Լիխի լեռնաշղթայով էր անցնում սահմանն Աբխազական ու Վրացական թագավորությունների միջև (նույն տեղում, էջ 52):

հանդիսանում երկրորդ Արմինիայի և Աբխազական թագավորության միջև¹⁰²:

Այսպիսով Արմինիա ոստիկանության սահմանագիծն Ալանաց դոնից դեպի արևելք Կովկասյան լեռների գագաթնագծով, Անդյան Կոյսուռի ձախափնյա ջրբաժանով, իսկ այնուհետև՝ Ավարյան Կոյսուռի արևելյան ջրբաժանով իջնելու էր հարավ ընդգրկելով այժմյան Ղուբաչի քաղաքի շրջակա տարածքն ու դրանից հյուսիս գտնվող լեռնային շրջանը զբաղեցնող Ֆիլանը: Արմինիայի արևելյան սահմանը Դարբանդից հարավ անցնում էր Կասպից ծովի արևմտյան ափագծով, իսկ հարավայինը Կուր և Երասխ գետերով շարժվելու էր դեպի արևմուտք մինչև Կոտոր դետի՝ Երասխը թափվելու տեղը, որտեղից Կոտոր դետի հունով իջնելու էր հարավ և, Զարեանդ ու Հեր գավառներն Արմինիայի կազմում ընդգրկելով, հասնելու էր Ուրմիո լճին ու վերջինիս արևմտյան ափագծով իջնելու էր մինչև այժմյան Բարանդուզ-չայ դետը, որի հունով ընթանալու էր դեպի արևմուտք և սկզբում Կորդվաց լեռների հարավակողմով, իսկ հետո մոտավորապես այսօրվա թուրք-իրաքյան սահմանագծով հասնելու էր Խարուր դետին: Այնուհետև սահմանը Զերմ (Բոհտան) գետի հարավային ջրբաժանով հասնելու էր Զերմ դետին, որտեղից Շատախի լեռների հարավային մասով շարժվելու էր արևմուտք՝ Արմինիայի կազմում ներառելով Սասունը: Ավելի արևմուտք սահմանը անցնելու էր սկզբում Տավրոսյան լեռների, իսկ այնուհետև Արդնիի լեռների ջրբաժանով, որից հետո էլ ընթանալով Արշամաշատ քաղաքի արևմտակողմով և հատելով Արածանի դետը՝ անցնելու էր Մնձուր (Մուղուր) և Խոզաթ գետերի ջրբաժանով: Դրանից հետո սահմանագիծը հատելու էր Մնձուր լեռներն ու դուրս էր գալու Կամախի շրջակայքը: Կամախից դեպի արևելք սահմանագիծն անցնելու էր Եփրատ գետով մինչև Դերջան և, այնուհետև, Եփրատ և Ճորոխ գետերի ջրբաժանով բարձրանալու էր հյուսիս, Սպեր քաղաքից դեպի արևելք հատեր Ճորոխը և հասնել Գարխարյան լեռների Վերջնբակ գագաթին: Սահմանագիծը, այնուհետև, Գարխարյան, Մոսքական ու Լիխի լեռների ջրբաժաններով հասնելու էր Ալանաց դոնին¹⁰³:

ГРАНИЦЫ НАМЕСТНИЧЕСТВА АРМИНИЯ

АРМАН ЕГИАЗАРЯН

Р е з ю м е

Уточнение границ наместничества Арминия Арабского халифата имеет важное значение для исторической географии Армении и соседних стран. Это наместничество занимало большую часть территории Великой Армении, Грузию

¹⁰² Ջ վ ա ն շ ե ռ, էջ 105:

¹⁰³ А. Т е р - Г е в о н д я н. Арминия в I половине IX в. (карта). — В кн.: "Армения и Арабский халифат", Ереван, 1977, с. 168.

и Албанию и прикаспийские области от Дербенда до нижнего течения реки Кур. В течение непрерывных войн образовались обширные буферные зоны на западных и северных границах Арминии. Западная буферная зона была автономной территорией, а северная целиком входила в состав Арминии. Южная граница Арминии проходила по реке Ерасх до реки Котор, а на западе охватывала северные части Парскаһайка и Корчайка, Мокк и Сасун. А северо-западная граница Арминии проходила по водоразделам Пархарских, Месхетских и Лихских гор.

BORDERS OF THE VICEGERENCY OF ARMINIA

ARMAN YEGHIAZARYAN

S u m m a r y

The definition of the borders of the Vicegerency of Arminia of the Arabian Caliphate has an important significance for historical geography of Armenia and neighboring countries. This Vicegerency occupied bigger part of the Greater Armenia, Georgia and Albania and the coastal regions of the Caspian Sea from Derbend up to the river Kur. During lasting wars large buffer zones were created on the North and West borders of Arminia. The West buffer zone was an autonomous territory, and the North buffer zone was fully included in the territory of Arminia. The South border of Arminia was along the river Eraskh up to the river Kotor, and then included north parts of Parskahayk and Korchayk, Mokq and Sasun. The northwestern border of Arminia was along the Parkhar, Moskakan and Likhi mountain ranges.